



An Dámhachtain do Thionscadail agus Léiriú

Dámhachtain 2026

Treoirlínte d'Iarratasóirí

le haghaidh gníomhaíochtaí tionscadail dar tús an 1 Eanáir 2026 nó ina dhiaidh sin agus léirithe a chuirfear i láthair in 2026

Spriocdháta: 5.30 p.m. (am na hÉireann), Déardaoin, an 20 Márta 2025

Iarratasóirí faoi mhíchumas

Déanann an Chomhairle Ealaíon gach iarracht freastal réasúnta a dhéanamh ar dhaoine faoi mhíchumas chun úsáid a bhaint as ár seirbhísí.

Má tá tú faoi mhíchumas agus má theastaíonn cúnamh uait le d'iarratas a chur isteach, déan teagmháil linn a luaithe is féidir roimh an spriocam.

Teagmhálaí: An tOifigeach Rochtana do Dhaoine faoi Mhíchumas

Guthán: 01 618 0200 nó 01 618 0243

Ríomhphost: access@artscouncil.ie

CLÁR

Pointí tábhachtacha nach mór cuimhneamh orthu	3
Cabhair a fháil maidir le d'iarratas	4
1. Faisnéis faoin Dámhachtain do Thionscadail agus Léiriú Ceoldrámaíochta	5
1.1 Cuspóirí agus tosaíochtaí na dámhachtana	5
1.2 Cé atá i dteideal iarratas a dhéanamh?	7
1.3 Cé hé an t-iarratasóir?	8
1.4 Cé nach bhfuil i dteideal iarratas a dhéanamh?	8
1.5 Cad ar ar féidir leat iarratas a dhéanamh?	9
1.6 Céard nach féidir leat iarratas a dhéanamh air?	12
1.7 Cén t-ábhar tacaíochta nach mór duit a chur isteach le d'iarratas?	12
1.8 Incháilitheacht	15
2. An dóigh le d'iarratas a dhéanamh	16
2.1 Cláraigh le Seirbhísí ar Líne na Comhairle Ealaíon	16
2.2 Líon isteach an fhoirm iarratais	17
2.3 Ullmhaigh aon ábhar tacaíochta atá riachtanach don iarratas	17
2.4 Iarratas a dhéanamh ar líne	19
3. Próiseáil agus measúnú na n-iarratas	21
3.1 Forbhreathnú	21
3.2 An próiseas measúnaithe	21
3.3 Critéir chun iarratais a mheasúnú	21
3.4 Painéal piaraí	22
3.5 Toradh na n-iarratas	23

Pointí tábhachtacha nach mór cuimhneamh orthu

- D'fhonn iarratas a dhéanamh, **ní mór** duit a bheith cláraithe le haghaidh cuntas Sheirbhísí Ar Líne na Comhairle Ealaíon (OLS). Mura bhfuil ceann agat, is féidir leat clárú le ceann a fháil [anseo](#). Tabhair faoi deara go bhféadfadh sé suas le **cúig lá oibre** a thógáil sular féidir úsáideoir nua a chlárú ar OLS, mar sin tabhair go leor ama duit féin é seo a dhéanamh sula mbeidh an spriocdháta buailte leat.
- Molaimid go láidir duit an cháipéis seo a léamh go cúramach sula dtosaíonn tú ar an bpróiseas chun d'iarratas a dhéanamh.
- Molaimid go láidir duit freisin tosú ar an bpróiseas go luath agus **neart ama** a fhágáil chun d'iarratas a dhéanamh.
- Molaimid go mbeadh sé mar aidhm agat d'iarratas a uaslódáil **daichead a hocht uair an chloig ar a laghad** roimh an spriocdháta fógartha. Ar an gcaoi sin, bheadh am agat dul i dteagmháil linn má bhíonn aon fhadhbanna teicniúla agat agus bheimis in ann cuidiú leat.
- Tabhair faoi deara, de bharr an lín mhóir iarrthóirí a úsáideann an córas ar líne lá an spriocdháta, nach féidir linn a dheimhniú go mbeimid in ann aon fhadhbanna teicniúla a bheadh agat a réiteach, sa chás go dtéann tú i dteagmháil linn **i ndiaidh a 2.00 p.m. lá an spriocdháta**.
- Léigh an seicliosta seo a leanas go cúramach:

-
- Tá na treoirlíne seo léite agam agus tuigim iad.
 - Sa chás go raibh fadhb agam, chuaigh mé i dteagmháil leis an gComhairle Ealaíon chun cúnamh a fháil, i bhfad roimh an spriocdháta.
 - Tá gach cuid den fhoirm iarratais a bhaineann le m'iarratas comhlánaithe agam.
 - Tá gach ábhar tacaíochta atá riachtanach ullmhaithe agam, mar a shonraítear sna treoirlínte seo, agus tá siad sin réidh le huaslódáil agam.
 - D'iarr mé ar dhuine éigin eile m'iarratas a sheiceáil chun a chinntiú nach bhfuil aon earráidí ann agus nach bhfuil aon rud ar iarraidh.
-

Cabhair a fháil maidir le d'iarratas

Má tá ceisteanna agat faoi shuíomh gréasáin na Seirbhísí ar Líne a úsáid, tabhair cuairt ar rannán na gCeisteanna Coitianta ar ár suíomh gréasáin: <http://www.artscouncil.ie/ga/Teigh-i-dteagmhail-linn/FAQS/Seirbhisi-ar-line/Seirbhisi-ar-line/>

Má tá ceist theicniúil agat faoin bpróiseas iarratais ar líne agus nach bhfuil freagra ar do cheist i rannán na gCeisteanna Coitianta, is féidir leat ríomhphost a sheoladh chuig onlineservices@artscouncil.ie, nó glaoch ar an gComhairle Ealaíon ar

- **01 618 0200**
- **01 618 0243**

Má bhíonn ceist agat faoi d'iarratas nach mbaineann le cúrsaí teicniúla, ba cheart duit teagmháil a dhéanamh leis an bhfoireann ealaíon a bhfuil iarratas ar mhaoiniú á chur faoina bráid agat ar ríomhphost nó ar an bhfón. <http://www.artscouncil.ie/ga/Teigh-i-dteagmhail-linn/Liostai-den-bhfoireann-agus-de-chomhairleoiri/>

Téigh chuig an nasc seo a leanas chun féachaint ar ár dtreoir ar YouTube maidir le hiarratas a dhéanamh <https://www.youtube.com/artscouncildemos>

1. Faisnéis faoin Dámhachtain do Thionscadail agus Léiriú Ceoldrámaíochta

1.1 Cuspóirí agus tosaíochtaí na dámhachtana

Is é cuspóir na Dámhachtana do Thionscadail agus Léiriú Ceoldrámaíochta tacú le tionscnaimh ó chleachtóirí gairmiúla maidir le forbairt agus cur i láthair ceoldráma ag trí chéim ar leith. Ar an gcaoi sin, spreagtar saothar ar ardchaighdeán ealaíonta a fhorbairt agus tacú le cur i láthair forbartha agus le léirithe iomlána ceoldrámaíochta gairmiúla lena mealltar an pobal chomh maith.

Is éard atá i gceist leis an dámhachtain tacú le déanamh agus le cur i láthair ceoldrámaí agus deiseanna a chur ar fáil d'ealaíontóirí de réir bheartas agus straitéis fhoilsithe na Comhairle Ealaíon le haghaidh na ceoldrámaíochta (ar fáil le híoslódáil ó rannán na bhfoilseachán ar shuíomh gréasáin na Comhairle Ealaíon: <http://www.artscouncil.ie>).

I ngach ceann de thrí shnáithe na dámhachtana, tabharfar tús áite d'iarratais a léiríonn na rudaí seo a leanas:

- Fís ealaíonta shoiléir agus fianaise go bhfuil an tionscadal a bheartaítear ar ardchaighdeán ealaíonta nó gur dóigh go mbeidh sé ar ardchaighdeán ealaíonta.
- Mórdheiseanna forbartha do chleachtóirí ceoldrámaíochta gairmiúla
- Iarratais atá ag teacht go soiléir le tosaíochtaí beartais agus straitéise na Comhairle i gcomhair na ceoldrámaíochta.

Tabhair faoi deara: iarratais ar léiriú a léiríodh ina iomláine cheana a thabhairt ar camchuart, ba cheart na hiarratais sin a chur chuig Scéim Camchuarite na Comhairle Ealaíon.

Leagtar tosaíochtaí breise amach thíos maidir le gach ceann de na trí shnáithe.

Snáithe 1: Tionscadail Cheoldrámaíochta: Forbairt Tionscadail

Is é cuspóir an tsnáithe um Fhorbairt Tionscadail tacú le healaíontóirí agus le foirne cruthaitheachta saothar úr a fhorbairt (nó, ó am go chéile, cuir chuige nua shuntasacha i leith léiriú saothar atá ann cheana féin a fhorbairt). Sa snáithe seo, cé gur chóir go mbeadh an saothar le taispeáint don phobal ar deireadh, níl aon riachtanas ann an saothar a chur i láthair lucht féachana.

Tabharfar tús áite sa snáithe seo freisin do thograí:

- Ina ndírítear ar smaointe nua a fhorbairt go comhoibríoch trí nuálaíocht agus trí thriail
- Deiseanna forbartha suntasacha a chur ar fáil do chleachtóirí
- Ina bhfuil fianaise ar bhéim ealaíne ardchaighdeán. Cuirfear cuntas teiste na bpríomhealaíontóirí san áireamh.

Snáithe 2: Tionscadail Cheoldrámaíochta: cur i láthair forbartha & léiriú iomlán ar scála níos lú

Is iad príomhchuspóirí an tsnáithe seo:

- An bealach a réiteach le saothar gairmiúil a chur i láthair an phobail mar chuid de phróiseas cruthaitheach forbartha

An Dámhachtain do Thionscadail agus Léiriú Ceoldrámaíochta 2026: Treoiríní d'Iarratasóirí

- Fianaise agus spreagadh a thabhairt d'fhonn tacú le deiseanna le haghaidh léiriú iomlán níos faide anonn
- Tacú le léiriú agus cur i láthair iomlán saothair ar scála beag.

Caithfidh tionscadail sa snáithe seo a bheith ag plé le lucht féachana atá oiriúnach do nádúr an tsaothair. D'fhéadfadh tograí a bheith le haghaidh léiriú iomlán, taibhiú ceardlainne nó taibhiú ceolchoirme ar shaothar iomlán nó ar chuid de shaothar. D'fhéadfadh fuaimthaifeadadh nó fístaifeadadh a bheith sna tograí mar chuid den tionscadal, de réir mar is cuí. Moltar d'iarratasóirí a bheith ag smaoineamh ar lucht féachana a bhaint amach trí mhodhanna éagsúla.

Ní mór d'iarratasóirí aonair faoin snáithe seo a bheith ábalta a chur in iúl go soiléir go bhfuil an tionscadal (an ghné léirithe phoiblí san áireamh) indéanta, go hidéalach ar bhonn tiomantas comhpháirtíochta ó léiritheoir sainoilte, amhail compántas léiriúcháin, amharclann/ionad, féile atá bunaithe cheana agus/nó eagraíocht ealaíon eile.

Tabharfar tús áite sa snáithe seo do thograí:

- Ar tionscadail ealaíonta ardchaighdeán iad ina léirítear cur chuige láidir samhlaíoch; cuirfear samplaí ábhartha de shaothar agus cuntas teiste na bpríomhealaíontóirí atá i gceist san áireamh.
- A chuirtear i láthair os comhair pobal cuí, agus plean soiléir chun an pobal sin a bhaint amach
- A bhaineann le ceoldrámaíocht nua a fhorbairt agus a chur i láthair
- A bhaineann le heagrán nua taibhithe de cheoldrámaí stairiúla na hÉireann a ullmhú agus a chur i láthair go poiblí
- A léiríonn fianaise gur féidir an tionscadal a chur i gcrích go rathúil, e.g. trí chuidiú ó chomhpháirtíochtaí breisluacha, agus fianaise ar bhuiséadú agus pleanáil fhónta léiriúcháin

Snáithe 3: Léiriú Ceoldrámaíochta

Is é cuspóir an snáithe um Léiriú Ceoldrámaíochta tacú le léiriúcháin iomlána ghairmiúla ar cheoldrámaí iomlána de shaothar nua nó de shaothar atá ann cheana féin, ar scála meánach nó níos mó agus d'aon seánra, a bhaineann lucht féachana beo agus lucht féachana eile amach agus a dhéanann teagmháil leo, agus deiseanna a chur ar fáil d'ealaíontóirí ceoldrámaíochta gairmiúla sa phróiseas. Cuirfear fáilte roimh iarratais ina bhfuil gnéithe atá deartha go maith d'fhonn luchtanna féachana nua do cheoldrámaí a mhealladh agus a fhorbairt.

Agus luchtanna féachana á mealladh, díríonn an dámhachtain ar chur chuige comhoibritheach a spreagadh maidir le léiriúcháin ceoldrámaí ardchaighdeán atá bunaithe ar chomhpháirtíochtaí breisluacha idir ealaíontóirí, léiritheoirí agus láithreoirí.

Ní mór d'iarratasóirí a bheith in ann caighdeán féideartha an léiriúcháin a thaispeáint **agus** straitéisí agus pleananna daingne, inchreidte a léiriú a bheidh ábalta raon agus rannpháirtíocht an phobail a mhéadú a oiread agus is féidir trí léiriú beo agus trí bhealaí eile chun lucht féachana a chruthú.

Agus iad ag smaoineamh ar thograí, cuirfidh an Chomhairle Ealaíon cothromaíocht sa réimse agus i gcineál an cheoldráma atá le maoiniú san áireamh, mar aon leis an méid a théann tograí i ngleic le stór agus rannpháirtíocht an phobail lena mbaineann tábhacht don Chomhairle Ealaíon mar atá léirithe i mbeartas agus i straitéis ceoldrámaíochta na Comhairle.

Tabharfar tús áite sa snáithe seo do thograí:

- Ar tograí léirithe ardchaighdeán iad ina léirítear cur chuige láidir samhlaíoch; cuirfear samplaí ábhartha de shaothar agus cuntas teiste na bpríomhealaíontóirí atá i gceist san áireamh
- Ina léirítear fianaise ar thiomantas soiléir agus daingean, pleananna mionsonraithe chun rochtain agus rannpháirtíocht an phobail a uasmhéadú, i dtéarmaí lucht féachana beo agus lucht féachana a shroictear ar bhealaí eile
- Ina soláthraítear stór ceoldrámaí a chomhlíonann riachtanas áirithe an lucht féachana mar chuid de sholáthar cothrom náisiúnta ceoldrámaíochta
- Ina mbaintear lucht féachana ar leith amach mar chuid de sholáthar cothrom náisiúnta spáis agus déimeagrafaice
- Ina dtaispeántar taithí chúí, buiséadú agus pleanáil fhónta i leith léiriú ceoldrámaíochta
- Ina dtaispeántar pleananna láidre agus inchreidte chun ioncam léirithe ó fhoinsí eile seachas ó mhaoiniú na Comhairle a uasmhéadú
- Ina n-úsáidtear samhlacha féideartha éifeachtúla léiriúcháin le comhpháirtithe cuí breisluacha.

Ba chóir iarratais maoinithe i Snáithe 3 atá faoi bhun €50,000 a chur isteach, ina áit seo, faoi Shnáithe 2.

Cuireann straitéis deich mbliana na Comhairle Ealaíon (2016–25), *Saothar Ealaíne Iontach a Tháirgeadh: Forbairt na nEalaíon in Éirinn a Threorú* an bonn eolais faoi na dámhachtainí uile (féach anseo: <http://www.artscouncil.ie/ga/straitéis-na-comhairle-ealaion/>). Cuireann straitéis agus beartas ceoldrámaíochta na Comhairle Ealaíon, *Saothar Ealaíne Iontach a Tháirgeadh: Straitéis agus Beartas Ceoldrámaíochta* bonn eolais níos mó faoi na dámhachtainí ceoldrámaíochta uile (féach anseo: <http://www.artscouncil.ie/uploadedFiles/OperaPolicyStrat2016.pdf>).

1.2 Cé atá i dteideal iarratas a dhéanamh?

Ní foláir nó go bhfuil iarratasóirí ina gcónaí i bPoblacht na hÉireann. Ach, i líon teoranta cásanna, féadfimid glacadh le hiarratais ó lasmuigh de Phoblacht na hÉireann. Sa chás seo, ní mór duit a lua i d'fhoirm iarratais an chaoi a rachadh do thogra chun tairbhe na n-ealaíon i bPoblacht na hÉireann. Chaithfimis a bheith sásta le do mhíniú.

Mar chuid dá [Beartas Comhionannais, Éagsúlachta agus Ionchuimsitheachta](#), tá an Chomhairle Ealaíon tiomanta do **chomhionannas rochtana, deiseanna agus torthaí** a chur ar fáil do gach iarratasóir féideartha beag beann ar

- Aois
- Stádas sibhialta nó teaghlaigh
- Míchumas
- Inscne
- Ballraíocht den Lucht Siúil
- Cine
- Reiligiún
- Claonadh gnéis
- Cúlra socheacnamaíoch.

Sa scéim maoinithe seo, cuireann an Chomhairle Ealaíon fáilte ar leith roimh iarratais ó

gach cuid de shochaí na hÉireann, lena n-áirítear aon cheann de na tréithe a luaitear thuas ach gan a bheith teoranta dóibh sin amháin agus/nó tionscnaimh a chuireann deiseanna nó torthaí cothroma ar fáil dóibh siúd atá bainteach leo.

Féadfaidh eagraíochtaí (ar nós ionaid léirithe) a fhaigheann Maoiniú Straitéiseach nó Maoiniú Deontais do na hEalaíona iarratas a dhéanamh, ar an gcoinníoll go dtaispeántar go bhfuil aon ghníomhaíocht agus aon mhaoiniú gaolmhar sa bhreis, agus ar leithligh, ar na gníomhaíochtaí dá bhfuair an eagraíocht sin Maoiniú Straitéiseach nó Maoiniú Deontais do na hEalaíona.

Ó am go chéile, féadfaidh ról dearfach a bheith ag compántais cheoldrámaíochta atá ag fáil Maoiniú Straitéiseach maidir le tacú le hiarratasóirí ar an Dámhachtain do Thionscadail agus Léiriú Ceoldrámaíochta nó maidir le comhpháirtíocht a dhéanamh leo. I gcásanna den chineál sin, ní mór don iarratasóir agus don chompántas tacaíochta a dheimhniú go bhfuil an tacaíocht atá á tairiscint agus ról beartaithe na heagraíochta atá maoinithe sa bhreis ar na gníomhaíochtaí dá bhfuil Maoiniú Straitéiseach faighte ag an eagraíocht, agus deighilte uathu, agus nach gcuirfidh an léiritheoir ceoldrámaíochta tacaíochta an saothar i láthair go poiblí ná ar bhealach eile mar léiriú nó comhléiriú dá chuid féin.

1.3 Cé hé an t-iarratasóir?

Is ionann an t-iarratasóir agus an duine nó an eagraíocht a gheobhaidh aon deontas a thairgfear agus a bheidh freagrach as glacadh le téarmaí agus le coinníollacha an deontais sin.

Maidir le hiarratais atá á n-ullmhú ag gníomhairí, bainisteoirí, cuideachtaí bainistíochta nó sainchomhairleoirí thar ceann ealaíontóirí nó eagraíochtaí ealaíon, ba chóir don ealaíontóir/do na healaíontóirí, don taibheoir/do na taibheoirí nó don eagraíocht/do na heagraíochtaí, lena mbaineann iad a chur isteach.

Ní íocfar aon deontas a thairgfear ach isteach i gcuntas bainc atá á shealbhú in ainm an iarratasóra.

Ní mór go mbeadh na cáipéisí go léir a chuirfear ar fáil in ainm an iarratasóra (ealaíontóir aonair nó eagraíocht ealaíon). Mar shampla, má dhéanann tú iarratas chuig an gComhairle Ealaíon ar mhaoiniú faoin ainm Máire de Barra, níor mhór go mbeadh gach cáipéis, lena n-áirítear sonraí bainc agus sonraí cánach, san ainm sin. Ní ghlacfar le leaganacha malartacha amhail Mary Barry nó Barry Studios.

1.4 Cé nach bhfuil i dteideal iarratas a dhéanamh?

Áirítear leo seo a leanas na daoine nach bhfuil i dteideal iarratas a dhéanamh:

- Compántais cheoldrámaíochta atá ag fáil Maoiniú Straitéiseach (féach ar na nótaí i gcuid 1.2 thuas maidir le tacaíocht ó léiritheoirí ceoldrámaíochta a fhaigheann Maoiniú Straitéiseach)
- Daoine aonair nó eagraíochtaí nach bhfuil cuntas teiste inléirithe mar ealaíontóirí/léiritheoirí/eagraíochtaí gairmiúla acu
- Daoine atá i mbun oideachas fochéime nó iarchéime faoi láthair nó a bheidh ina bhun le linn na tréimhse a bhfuil an dámhachtain seo ar fáil.
- Comhaltaí de Chomhairle na bhForas Cultúrtha Náisiúnta (CNCI) atá maoinithe go díreach ag an Roinn Turasóireachta, Cultúir, Ealaíon, Gaeltachta, Spóirt agus Meán.

1.5 Cad ar ar féidir leat iarratas a dhéanamh?

Tá trí bhanda maoinithe ar fáil a bhaineann leis na trí shnáithe den Dámhachtain do Thionscadail agus Léiriú Ceoldrámaíochta:

- Snáithe 1: Forbairt na Ceoldrámaíochta: suas le €25,000 **ar a mhéad**
- Snáithe 2: Cur i Láthair Forbartha na Ceoldrámaíochta: suas le **€120,000** ar a mhéad
- Snáithe 3: Léiriú Ceoldrámaíochta: suas le €450,000 **ar a mhéad** (**Tabhair faoi deara:** ba chóir d'iarratais ar mhaoiniú iomlán léirithe faoi bhun €50,000 cur isteach ar Shnáithe 2 in ionad an tsnáithe seo).

Tabhair faoi deara nach mbronnfar méideanna den chineál uasta sin ach i gcásanna eisceachtúla i ngach snáithe.

Agus tú ag déanamh iarratais, ba chóir duit an maoiniú atá tú a lorg a shonrú go réalaióch. Is é a bheidh sa mhéid sin ná an difríocht idir costais mheasta an tionscadail nó na léiriúchán agus réamh-mheastachán réasúnta d'ioncam ó fhoinsí difriúla de réir mar is cuí. Beidh ort a léiriú go soiléir conas a chuirfidh sruthanna ioncaim eile (más ábhartha) le do chumas an togra a dhéanamh.

Féadfaidh le hiarratasóirí cur isteach ar níos mó ná aon bhabhta amháin den Dámhachtain do Thionscadail agus Léiriú Ceoldrámaíochta, fad is nach gcuireann sé/sí níos mó ná aon iarratas amháin isteach in aghaidh an tsnáithe. Ní mór duit an snáithe ar a bhfuil iarratas á dhéanamh agat a chur in iúl go soiléir i gcuid 1.5 den fhoirm iarratais.

Ba chóir d'iarratasóirí a thabhairt faoi deara freisin nach gciallaíonn sé má éiríonn le duine maoiniú a fháil faoi shnáitheanna 1 nó 2 gurb amhlaidh nó gur dócha go n-éireoidh leis an duine sin nó go mbeidh níos mó seans ann go n-éireoidh le haon iarratais ina dhiaidh sin an tionscadal sin a fhorbairt níos mó i snáitheanna 2 nó 3.

Costais rochtana d'ealaíontóirí nó rannpháirtithe¹ faoi mhíchumas

Táimid tiomanta dár scéimeanna maoinithe agus an obair a mhaoinimid a dhéanamh inrochtana do chách. Chun an sprioc sin a bhaint amach, cuirimid tacaíochtaí airgeadais ar fáil chun bacainní a bhaint d'ealaíontóirí agus do rannpháirtithe faoi mhíchumas. Costais rochtana do dhaoine faoi mhíchumas a thugtar orthu seo.

Glacaimid an cur síos ar mhíchumas ó Choinbhinsiún na Náisiún Aontaithe ar Chearta Daoine faoi Mhíchumas, mar aon le reachtaíocht agus cásdlí na hÉireann. Cuimsímid gach duine faoi mhíchumas go forleathan. Mar shampla, daoine ar a bhfuil lagú fisiciúil, leighis, cognaíoch, intleachtúil, foghlama, mothúchánach, nó céadfach.

Is ann do dhá chineál costas rochtana do dhaoine faoi mhíchumas a d'fhéadfadh a bheith ort a bhreithniú le haghaidh d'iarratais: costais rochtana phearsanta do dhaoine faoi mhíchumas agus costais rochtana lucht féachana do dhaoine faoi mhíchumas.

Cuireann an Chomhairle Ealaíon maoiniú ar leith ar fáil i gcás costais rochtana phearsanta do dhaoine faoi mhíchumas anuas ar do chroí-bhuiséad. Ní mór duit costais rochtana lucht féachana do dhaoine faoi mhíchumas a mhaoiniú ó thaobh istigh de do chroí-bhuiséad.

1. Costais phearsanta rochtana do dhaoine faoi mhíchumas

Ba cheart go gcuideodh na tacaíochtaí seo leat bacainní a bhaint d'ealaíontóirí nó do rannpháirtithe faoi mhíchumas a bhfuil do thogra á sheachadadh acu. Mar shampla:

¹ Tugann an Chomhairle Ealaíon sainmhíniú ar rannpháirtithe mar iad siúd a chuireann iad féin in iúl go cruthaitheach trí pháirt a ghlacadh i ngníomhaíochtaí ealaíonta.

- Tusa
- Na príomhealaíontóirí, daoine aonair, grúpaí nó eagraíochtaí a bhfuil baint acu le do thogra
- Comhpháirtithe, meantóirí nó comhoibrithe
- Foireann léiriúcháin
- Príomhfhoireann nó príomhphearsanra riaracháin.

Seo a leanas samplaí de thacaíochtaí, ach gan bheith teoranta dóibh:

- Ateangaire Theanga Chomharthaíochta na hÉireann do rannpháirtí nó do rannpháirtithe
- Seirbhísí oibrí tacaíochta rochtana.
- Am breise cleachtaidh nó sa stiúideo.

Tabhair faoi deara: is féidir cur isteach ar na costais seo anuas ar an uasmhéid atá ar fáil don dámhachtain.

2. Costais rochtana lucht féachana do dhaoine faoi mhíchumas

Is costais iad seo a bhaineann le do chuid oibre a dhéanamh insroichte do dhaoine faoi mhíchumas. Táimid ag iarraidh a chinntiú go mbainfidh tuilleadh daoine sásamh as eispéiris ealaíon ar ardchaighdeán agus gur féidir le gach duine rochtain a fháil ar, agus sásamh a bhaint as an obair a mhaoinímid. Ba cheart rochtain do dhaoine den lucht féachana faoi mhíchumas a mheas mar ghnáthchuid de do chuid oibre.

Samplaí de thacaíochtaí chun do chuid oibre a dhéanamh insroichte do do lucht féachana is ea:

- Ateangaire TCE le haghaidh d'imeacht nó le haghaidh do thaibhithe
- Seirbhís tráchtairachta fuaimne a úsáid
- Do shuíomh gréasáin a chur in oiriúint do léitheoirí scáileáin
- Ábhair thaispeántais a chruthú i bhformáidí eile amhail Braille nó fuaim.

Nóta: ní chuireann an Chomhairle Ealaíon maoiniú breise ar fáil do na costais sin i láthair na huair. Tá teimpléad roghnach ar fáil ar leathanach maoinithe [An Dámhachtain do Léiriúcháin Ceoldráma](#) ar shuíomh gréasáin na Comhairle Ealaíon. Ní mór duit na costais sin a chur san áireamh i do chroí-bhuiséad iarratais.

Conas iarratas a dhéanamh ar chostais rochtana do dhaoine faoi mhíchumas

Má chuireann tú costais rochtana do dhaoine faoi mhíchumas san áireamh i do thogra, ní mór duit cáipéis a uaslódáil freisin ina liostaítear na costais sin i dteannta na n-ábhar tacaíochta. Ní mór duit na costais a léiriú in dhá líne ar leithligh de d'fhoirm iarratais freisin:

- Líne do chostais rochtana phearsanta do dhaoine faoi mhíchumas

- Líne do chostais rochtana lucht féachana do dhaoine faoi mhíchumas.

Tabhair faoi deara: is cuma má úsáideann tú do cháipéis féin nó teimpléad na Comhairle Ealaíon, ní mór an dá chineál costas rochtana do dhaoine faoi mhíchumas a thaispeáint ar leithligh.

Cad a tharlóidh má tá an maoiniú a thairgtear dom níos lú ná an méid a d'iarr mé?

Má thairgtear maoiniú duit atá níos lú ná an méid a d'iarr tú, pléifimid leat conas a bheartaíonn tú do ghníomhaíocht mholta a sheachadadh agus athbhreithniú á dhéanamh agat ar an mbuiséad athbhreithnithe. Pléifimid coigeartú cuí ar do chostais rochtana do dhaoine faoi mhíchumas freisin.

Cén chaoi a n-éilím mo chostais rochtana phearsanta do dhaoine faoi mhíchumas?

Má éiríonn le d'iarratas, tabharfaimid eolas duit maidir leis an gcaoi le do mhaoiniú a tharraingt anuas. Déantar costais rochtana phearsanta do dhaoine faoi mhíchumas a tharraingt anuas ar leithligh ó do chroímaoiniú. B'fhéidir go n-iarrfaí ort tuairisc ghairid a chomhlánú ar an gcaoi ar úsáid tú na cistí sin.

Cé mhéad maoinithe ar féidir leat iarratas a dhéanamh air?

Agus tú ag cur isteach ar mhaoiniú i gcomhair na Dámhachtana do Thionscadail agus Léiriú Ceoldrámaíochta, ní mór duit buiséad a chur isteach ina bhfuil liosta de gach mír ioncaim agus caiteachais a bhaineann le do thogra beartaithe. Tá buiséad achoimre san áireamh san fhoirm iarratais, agus sonraítear na cineálacha **buiséad mionsonraithe ar leithligh, a theastaíonn i gcomhair shnáitheanna 2 & 3**, agus atá roghnach i snáithe 1, sonraítear iad sin i gcuid 1.7.

Is ionann an t-uasmhéid maoinithe is féidir leat a iarraidh agus an difríocht idir an **caiteachas beartaithe** agus an **t-ioncam beartaithe** a shonraíonn tú sa bhuiséad.

- Ba cheart go n-áireofaí leis an gcaiteachas beartaithe táillí iomlána,* pá, costais theicniúla, costais mhargaíochta agus phoiblíochta, costais riaracháin, etc.
- Ba chóir go n-áireofaí leis an ioncam beartaithe an méid airgid a shíleann tú a gheofar ó mhaoinitheoirí eile, urraitheoirí, fáltais ó dhíol ticéad, deontóirí, díolacháin clár, etc.

Is tábhachtach freisin gach tacaíocht chomhchineáil** a léiriú san ioncam agus sa chaiteachas araon chun fíorluach agus luach iomlán do thogra a chur in iúl.

*** Nóta maidir le pá ealaíontóirí**

Tá an Chomhairle Ealaíon tiomanta do phá agus coinníollacha ealaíontóirí a fheabhsú. D'fhoilsíomar [beartas](#) maidir le luach saothair agus conraitheoireacht chóir chothrom ealaíontóirí. Tá sé tábhachtach go léann tú an beartas sin sula ndéanann tú d'iarratas. Iarrfar ort, mar chuid den phróiseas iarratais, an chaoi a gcinnteoidh tú pá cóir agus coinníollacha cearta do na healaíontóirí a oibríonn leat a leagan amach. Cabhróidh sé seo linn indéantacht d'iarratais a mheas.

**** Nóta maidir le tacaíocht chomhchineáil**

Má tá tú ag súil le tacaíocht chomhchineáil a fháil, is gá duit luach airgeadais a chur uirthi ionas go mbeidh an ranníocaíocht a dhéanann sí le fíorluach do thogra soiléir. Ba cheart duit caitheamh le tacaíocht chomhchineáil mar chaiteachas agus mar ioncam araon: pé méid a dhearbhaíonn tú ar thaobh an chaiteachais, ba cheart duit é a dhearbhu freisin ar thaobh an ioncaim.

Ní féidir am a thugann na stiúrthóirí nó comhaltaí boird a áireamh mar chostas comhchineáil.

Iarrtar ort an t-ioncam, an caiteachas agus an méid atá á iarraidh agat a shonrú ag trí chéim le linn d'iarratais:

- Ar líne, nuair a chuirfidh tú tús leis an iarratas (na figiúirí iomlána amháin)
- I gcuid 3 den fhoirm iarratais (achomre buiséid)
- Ar aon bhuiséad mionsonraithe a chuireann tú isteach mar chuid d'iarratas (éigeantach do shnáitheanna 2 agus 3, roghnach do shnáithe 1).

Cinntigh go bhfuil na figiúirí iomlána mar an gcéanna sna trí chás agus cinntigh gurb ionann an méid atá á iarraidh agus CAITEACHAS IOMLÁN lúide IONCAM IOMLÁN.

1.6 Céard nach féidir leat iarratas a dhéanamh air?

I measc na gcostas nach féidir leat cur isteach orthu, tá na cinn seo a leanas:

- Mórcheannacháin chaipitiúla
- Príomhchostais leanúnacha nach mbaineann go sainiúil leis an tionscadal ná léiriú bainteach
- Costais nach n-oireann do chuspóir na dámhachtana.

I measc na ngníomhaíochtaí nach féidir leat cur isteach orthu, tá na cinn seo a leanas:

- Gníomhaíochtaí nach n-oireann do chuspóir na dámhachtana
- Gníomhaíochtaí a d'oirfeadh níos fearr do dhámhachtain eile arna maoiniú ag an gComhairle Ealaíon nó arna feidhmiú ag gníomhaireachtaí Stáit eile, amhail Cultúr Éireann
- Gníomhaíochtaí a tosaíodh cheana féin nó a críochnaíodh roimh an 1 Eanáir 2026
- Tionscadail nó léirithe ar cuid nó fochuid iad d'oideachas foirmiúil scoláirí/mic léinn i scoileanna, coláistí nó institiúidí oideachais tríú leibhéal
- Gníomhaíochtaí ag carthanais chláráithe chun airgead a bhailiú d'eagraíochtaí eile
- Gníomhaíochtaí a bhfuil sé mar aidhm acu páirt a ghlacadh i gcomórtas
- Gníomhaíochtaí chun brabús a dhéanamh
- Gníomhaíochtaí a ndearna an Chomhairle Ealaíon measúnú orthu cheana féin, mura féidir leat a léiriú go ndearna tú an togra a fhorbairt go suntasach óna chuir tú iarratas isteach an uair roimhe **nó** má mhol an Chomhairle Ealaíon duit go sonrach d'iarratas a atreorú chuig an dámhachtain seo. Cuimhnigh, áfach, nach ionann a leithéid de chomhairle agus léiriú go n-éireoidh leis an iarratas.

1.7 Cén t-ábhar tacaíochta nach mór duit a chur isteach le d'iarratas?

Ciallaíonn ábhar tacaíochta ábhar **ar leith ó** d'fhoirm iarratais agus **sa bhreis air**. Cabhraíonn sé seo leis an duine a bhfuil measúnú á dhéanamh aige ar d'iarratas chun tuiscint níos soiléire a fháil ar do thogra. Léigh an liosta seo a leanas den ábhar tacaíochta a theastaíonn go han-chúramach, mar is é an chúis is mó a meastar iarratais a bheith neamh-incháilithe ná go dteiptear cloí leis seo.

Le bheith incháilithe le haghaidh measúnú i gcomhair na Dámhachtana do Thionscadail agus Léiriú Ceoldrámaíochta, **caithfidh** tú an t-ábhar tacaíochta seo a leanas a chur isteach ar líne:

- **Gach snáithe:** CVanna mionsonraithe atá cothrom le dáta (trí leathanach ar a mhéad) de chuid na bpríomhealaíontóirí atá páirteach sa tionscadal a bheartaítear.
- **Gach snáithe:** samplaí de do chuid saothair: 1–3 (ar a mhéad) chomhad AV d'ardchaighdeán agus/nó naisc (chuig comhaid AV) ina léirítear obair an chompántais agus/nó obair phríomhphearsanra ealaíne a léiríonn a gcleachtais agus a dhéanann a gcuntas teiste go dtí seo a rianú. (**TÁBHACHTACH:** féach ar na nótaí maidir le formáidí agus ardáin ghréasáin a nglactar leo thíos, agus tabhair faoi deara nach nglactar le naisc chuig do shuíomh gréasáin féin faoi láthair.) I gcás cumadóirí a chumann scóir go rialta mar chuid dá gcleachtas, ba chóir trí scór nó trí shliocht shuntasacha ó scór, ar a mhéad, de shaothair cheoil a cuireadh i gcrích le déanaí nó a foilsíodh roimhe seo a sholáthar.
Tabhair faoi deara: caithfear scóir a uaslódáil mar chomhaid PDF (féach thíos) agus a bheith de bhreis ar na comhaid AV a sholáthraítear.
- **Gach snáithe (nuair is iomchuí):** fianaise ar aon tacaíocht airgeadais nó urraíocht a aithníodh sa bhuiséad togra – e.g. meabhrán tuisceana, litir thairisceana, ráiteas tacaíochta, nó a leithéid de cháipéis
- **Gach snáithe (nuair is iomchuí):** litir/doiciméadúchán tacaíochta ó aon duine nó eagraíocht chomhpháirtíochta shuntasach.
- **Gach snáithe (nuair is iomchuí):** má tá scóir cheoil á gcur isteach chun tacú le hiarratas, ba chóir iad sin a chur i láthair mar chomhaid PDF.
- **Snáithe 2:** buiséad mionsonraithe, ar leithligh, ina leagtar amach an t-ioncam agus an caiteachas a bheartaítear don tionscadal; ba chóir go mbeadh sé sin i gcáipéis scarbhileoige Excel **Tabhair faoi deara:** tá sé sin sa bhreis ar an bhfaisnéis bhuiséid a thugtar san fhoirm iarratais.
- **Snáithe 3:** buiséad mionsonraithe comhlánaithe do léiriú na ceoldrámaíochta – ní mór duit úsáid a bhaint as an leagan is déanaí de theimpléad buiséid na Comhairle Ealaíon ina leith seo. Is féidir leat é a íoslódáil ar an leathanach Tionscadal agus Léiriú Ceoldrámaíochta ar shuíomh gréasáin na Comhairle Ealaíon (<http://www.artscouncil.ie/ga/Cisti/An-Damhachtain-do-Leiriuchan-Ceoldrama/>).
Tabhair faoi deara: tá sé sin sa bhreis ar an bhfaisnéis bhuiséid a thugtar san fhoirm iarratais.

Tabhair faoi deara: is féidir úsáid a bhaint as naisc chuig ardáin sruthaithe le samplaí de shaothar a thabhairt. Ní mór ábhar tacaíochta neamhspleách amhail CVanna agus litreacha tacaíochta etc. a uaslódáil mar cháipéisí ar leith le d'iarratas.

Ábhar breise a bhíonn de dhíth i gcásanna áirithe

Má tá tú ag lorg costais rochtana bhreise phearsanta do dhaoine nó do rannpháirtithe faoi mhíchumas nó don lucht féachana faoi mhíchumas, cuir cáipéis san áireamh ina leagtar amach na costais sin, agus an chaoi ar thángthas orthu. Déan cinnte go gcuireann tú an méid breise san áireamh mar chuid de do bhuiséad.

Má tá obair le hainmhithe i gceist le do thogra, ní mór duit cóip de do *Bheartas agus Nósanna Imeachta um Chosaint Ainmhithe* a chur ar fáil.

Maidir le hiarratais a bhaineann le leanaí agus le daoine óga atá faoi bhun ocht mbliana déag d'aois

Éilíonn an Chomhairle Ealaíon ar gach duine aonair agus ar gach eagraíocht a sholáthraíonn seirbhísí (mar shampla seirbhísí cultúrtha, áineasa, oideachais) do leanaí agus do dhaoine óga atá faoi bhun ocht mbliana déag d'aois beartais agus nósanna imeachta oiriúnacha um chosaint leanaí a chur i bhfeidhm. Agus iarratas á dhéanamh agat, **caithfidh** tú a chur in iúl i gcuid 1 den fhoirm iarratais cé acu a bhaineann do thogra leis an aoisghrúpa seo nó nach mbaineann.

- Má fhreagraíonn tú 'Tá' ar an gceist seo san fhoirm iarratais agus má éiríonn le d'iarratas, beidh ort, mar choinníoll maoiniúcháin, a dheimhniú agus a léiriú go bhfuil beartais agus nósanna imeachta oiriúnacha um chosaint leanaí i bhfeidhm agat.
- Má éiríonn leat, iarrfar ort Féin-iniúchadh Dearbhaithe Cáilíochta na Comhairle Ealaíon i dtaca le Cosaint agus Leas Leanaí a chomhlánú ar <https://childprotection.artscouncil.ie/>. Téigh chuig www.tusla.ie le tuilleadh faisnéise a fháil maidir le Tús Áite do Leanaí.
- Éileofar ort freisin do chuid sonraí a nuashonrú sa táb faisnéise faoin bpróifíl sa chuntas Seirbhísí ar Líne (gabh chuig an rannán chun do chuntas a nuashonrú chun sin a dhéanamh).

Maidir le hiarratais a bhaineann le daoine fásta soghonta

Agus iarratas á dhéanamh agat, **caithfidh** tú a chur in iúl i gcuid 1 den fhoirm iarratais an bhfuil obair le nó le haghaidh daoine soghonta mar chuid de do thogra nó nach bhfuil. Má fhreagraíonn tú 'Tá' don cheist seo, cuireann tú in iúl go n-oibreoidh tú leis an gchórt seo nó go gcuirfidh tú obair i láthair don chórt seo mar chuid de do thogra agus go n-aithníonn tú go bhfuil tú ar an eolas maidir leis an *mBeartas agus na Nósanna Imeachta Náisiúnta um Chosaint Daoine Soghonta atá i mBaol Mí-úsáide* agus go gcloíonn tú leis (féach [anseo](#)).

Tabhair faoi deara le do thoil go bhféadfaí iarraidh ort níos mó fianaise maidir le comhlíonadh na mbeartas seo a chur ar fáil má éiríonn le d'iarratas.

Measfar d'iarratas neamh-incháilithe mura gcuirfidh tú an t-ábhar tacaíochta ábhartha riachtanach isteach.

An fhormáid le haghaidh ábhar tacaíochta

Ní mór gach ábhar tacaíochta don Dámhachtain do Thionscadail agus Léiriú Ceoldrámaíochta a chur isteach ar líne. Ní ghlacfar le hábhar tacaíochta i gcrúachóip. Lean na treoirlínte seo le haghaidh na gcineálacha éagsúla ábhar tacaíochta.

Cuir faisnéis chomhthéacsúil san áireamh le haghaidh gach ábhair tacaíochta i dtéacschomhad atá lipéadaithe go soiléir.

Comhaid físe	Maidir le comhaid físe ar bith a chuireann tú isteach, ní mór duit an fhaisnéis chomhthéacsúil ábhartha a chur ar fáil. D'fhéadfadh sonraí a bheith i gceist leis sin faoin saothar, cá huair a léiríodh nó cá háit ar léiríodh é, tráchtairacht ar théama an tsaothair nó tráchtairacht ghinearálta, ainm na dtaibheoirí, agus conas a maoiníodh an saothar (e.g. dámhachtain, féinmhaoiniú). Níor chóir go mbeadh na sleachta níos faide ná trí nóiméad agus níor
---------------------	---

chóir níos mó ná trí shliocht ábhartha a chur isteach.

**Taifeadtaí
ceoil/fuaime**

Áirigh ainmneacha taibheoirí agus tabhair sonraí ionstraimíocht más iomchuí.

Cuir teidil chruinn ar na gcomhaid fuaime trí úsáid a bhaint as an gcoinbhinsiún ainmníochta seo a leanas:

Cumadóir(i) – taibheoir(i)/ensemble – ainm an fhuaimriain Níor chóir go mbeadh na sleachta fuaime níos faide ná trí nóiméad agus níor chóir níos mó ná trí shliocht ábhartha a chur isteach.

Má bhíonn tuilleadh faisnéise uait faoi na formáidí is féidir leat a úsáid faoi choinne an ábhair tacaíochta is mian leat a uaslódáil mar chuid de d'iarratas, féach ar chuid **2.3**

Ullmhaigh aon ábhar tacaíochta atá riachtanach don iarratas.

1.8 Incháilitheacht

Measfar go bhfuil d'iarratas **neamh-incháilithe** agus ní chuirfear é chun cinn go dtí an chéad chéim eile den phróiseas má bhaineann aon cheann de na rudaí seo a leanas leis:

1. Chuir tú an t-iarratas isteach i ndiaidh an spriocdháta
2. Níor chomhlánaigh tú gach cuid den fhoirm iarratais a bhaineann le do thogra
3. Níl tú incháilithe iarratas a dhéanamh faoi na critéir a leagtar amach i gcuid 1.2 agus i gcuid 1.4 thuas
4. Chuir tú isteach ar mhéid maoinithe atá níos mó ná an t-uasmhéid a cheadaítear don dámhachtain ar a bhfuil iarratas á dhéanamh agat, faoi mar a leagtar amach i rannán 1.5 thuas (ach amháin nuair atá tú ag déanamh iarratas ar mhéid breise chun costais rochtana a dhíol).
5. Cuireann tú iarratas isteach le haghaidh gníomhaíochta nó cuspóra nach féidir iarratas a dhéanamh ina leith faoi mar a leagtar amach i gcuid 1.6 thuas.
6. Níor chuir tú gach ceann de na hábhair thacaíochta riachtanacha mar a leagtar amach i gcuid 1.7 thuas ar fáil.
7. Tá d'iarratas níos oiriúnaí do chlár maoinithe eile a thairgeann an Chomhairle Ealaíon nó gníomhaireacht maoinithe eile (cuirimid an deis maoinithe níos oiriúnaí in iúl duit sa chás seo).

Tabhair faoi deara: sa chás go meastar go bhfuil d'iarratas neamh-incháilithe, ní dhéanfar measúnú air agus beidh tú in ann iarratas a dhéanamh leis an togra céanna i mbabhtaí maoinithe sa todhcháí.

2. An dóigh le d'iarratas a dhéanamh

2.1 Cláraigh le Seirbhísí ar Líne na Comhairle Ealaíon

Ní mór gach iarratas a dhéanamh trí Sheirbhísí ar Líne na Comhairle Ealaíon; ní ghlacfar le hiarratais a dhéanfar ar bhealach ar bith eile (sa phost, ar facs nó ar ríomhphost).

Ní mór go mbeadh cuntas Seirbhísí ar Líne agat chun iarratas a dhéanamh. Mura bhfuil cuntas Seirbhísí ar Líne agat cheana féin, cláraigh do chuntas tríd an bhfoirm chlárúcháin a chomhlánú anseo: <https://onlineservices.artscouncil.ie/register.aspx?&lang=gd-ge>.

Laistigh de chúig lá oibre, seolfar ARN (Uimhir Thagartha Ealaíontóra) uathúil agus pasfhocal chugat trí ríomhphost, agus beidh tú in ann úsáid a bhaint astu chun logáil isteach ar na Seirbhísí ar Líne.

Riachtanais maidir leis na Seirbhísí ar Líne a úsáid

Tabhair faoi deara: caithfidh tú ríomhaire nó ríomhaire glúine a úsáid chun d'iarratas a chur isteach. Ní oibríonn ár láithreán gréasáin Seirbhísí ar Líne ar fhóin ná ar tháibléid.

Ní mór do do ríomhaire agus don bhrabhsálaí idirlín na riachtanais seo a leanas a chomhlíonadh ionas go n-oibreoidh na Seirbhísí ar Líne duit:

-
- | | |
|------------|--|
| PC | <ul style="list-style-type: none">• Córas oibriúcháin Windows 7 nó leagan níos déanaí de Windows• Oibreoidh OLS leis na leaganacha is déanaí de gach brabhsálaí – e.g. Microsoft Edge, Google Chrome, Safari, Mozilla Firefox |
| Mac | <ul style="list-style-type: none">• Mac OS X v10.5 Leopard nó leagan níos déanaí de chóras oibriúcháin Mac• Oibreoidh OLS leis na leaganacha is déanaí de gach brabhsálaí – e.g. Microsoft Edge, Google Chrome, Safari, Mozilla Firefox |
-

Tabhair faoi deara: ní mór go mbeidh Microsoft Word (Deasc) nó OpenOffice Writer suiteáilte freisin chun an fhoirm iarratais féin a chomhlánú. Bogearra saor in aisce is ea OpenOffice Writer is féidir a íoslódáil anseo: <https://www.openoffice.org>.

Úsáideoirí OpenOffice

Féach ar ár bhfíseán *Using OpenOffice to download, complete and upload the application form* ag <https://www.youtube.com/watch?v=iT9Xxgmg0Eo>.

Ní mór duit OpenOffice Writer leagan 4.0.1 nó níos luaithe a úsáid. Nuair a úsáidtear leaganacha níos déanaí ná 4.0.1 de OpenOffice Writer athraíonn an chaoi a bhfeictear ár bhfoirmeacha iarratais nuair a chuirtear isteach trí Sheirbhísí ar Líne iad.

Nótaí tábhachtacha d'úsáideoirí Apple Mac

- Tabhair faoi deara an chuid san fhíseán YouTube (ag 1 nóim. 20, tá an nasc ar fáil thuas) ina bpléitear leis an leagan 4.0.1 a íoslódáil ar ríomhairí Mac ar a mbeadh an córas oibriúcháin Mac OS Mojave nó leagan níos luaithe suiteáilte.

- Ní féidir OpenOffice 4.0.1 a íoslódáil ar Mac ar a bhfuil an córas oibriúcháin MAC OS Catalina. Má tá an córas oibriúcháin seo nó leagan níos déanaí de suiteáilte ar do Mac, beidh ort leagan 4.1.9 de OpenOffice, nó leagan níos nuaí de, a íoslódáil agus a úsáid. Mura féidir leat aon cheann de na riachtanais sin a chomhlíonadh nó mura dtuigeann tú iad, téigh i dteagmháil linn le comhairle a fháil chomh luath agus is féidir leat roimh an spriocdháta.

Fág do dhóthain ama agat féin chun an t-iarratas a chomhlánú

Ba cheart duit eolas a chur ar shuíomh gréasáin na Seirbhísí ar Líne tamall maith roimh an spriocdháta agus roimh duit iarratas a ullmhú. Is dócha go mbeidh an-chuid cuairteoirí ar an suíomh tráthnóna an spriocdháta. Ba cheart duit d'iarratas a ullmhú agus a chur isteach tamall maith roimh an spriocdháta.

D'fhéadfadh an t-am uaslódála a bheith i bhfad níos faide ná an t-am íoslódála. D'fhéadfadh sé go dtógfadh sé níos faide ná mar a cheapfá d'ábhar tacaíochta a uaslódáil.

Tacaíocht theicniúil a fháil

Má bhíonn tacaíocht theicniúil uait agus iarratas ar líne á dhéanamh agat, is féidir leat dul i dteagmháil leis an gComhairle Ealaíon ach ríomhphost a sheoladh chuig onlineservices@artscouncil.ie nó trí ghlaoch a chur ar 01 6180200/01 6180243. Molaimid duit aon deacrachtaí teicniúla a thuairisciú dúinn tamall maith roimh an spriocdháta. Tabhair uimhir ghutháin agus déan cinnte go bhfuil tú ar fáil chun glaoch uainn a fhreagairt.

Déileálaimid le fiosruithe ar bhonn tús freastail ar an gceann is tuisce.

Cuimhnigh go ndéantar anrud glaonna ag druidim leis an spriocdháta agus go mb'fhéidir nach réiteofar glaonna i dtaobh tacaíocht theicniúil a gheofar tar éis a 2.00 p.m. ar lá an spriocdháta.

2.2 Líon isteach an fhoirm iarratais

Mura bhfuil sé seo déanta agat cheana féin, íoslódáil an fhoirm iarratais don dámhachtain ar mian leat iarratas a dhéanamh uirthi. Is cáipéis Microsoft Word (Deisce)/OpenOffice Writer í an fhoirm iarratais, a chomhlánóidh tú as líne (ar do ríomhaire féin). Tugtar treoir ar an bhfoirm iarratais maidir le conas gach cuid den fhoirm a líonadh isteach.

Tabhair faoi deara: tá an fhoirm iarratais leagtha amach chun go mbeidh an Chomhairle Ealaíon in ann faisnéis a bhaint uaithi chun críocha measúnaithe. Tá sé **thar a bheith tábhachtach** go mbeidh freagraí clóscríofa sna boscaí liatha ar an bhfoirm, agus nach mbainfear iad agus/nó nach mbeidh rud ar bith clóscríofa lasmuigh díobh. Má dhéanann tú é sin, beidh fadhbanna ann agus d'fhoirm á huaslódáil.

2.3 Ullmhaigh aon ábhar tacaíochta atá riachtanach don iarratas

Ní mór duit ábhar tacaíochta a chur isteach le d'iarratas. Mar shampla, d'fhéadfadh go mbeadh CV nó samplaí de shaothar reatha de do chuid i gceist leis seo – e.g. téacs, físeán, íomhánna nó taifeadtaí fuaimne (féach ar chuid **1.7 Cén t-ábhar tacaíochta nach mór duit a chur isteach le d'iarratas?**).

Ní mór duit an t-ábhar tacaíochta uile den sórt sin a chur isteach ar líne – ba cheart duit, más gá, ábhar a scanadh nó a shábháil i bhformáid leictreonach.

Na formáidí comhaid a nglactar leo

Liostaítear sa tábla seo a leanas formáidí comhaid do d'ábhar tacaíochta.

Cineál comhaid	Iarmhír comhadainm
téacscomhaid	.rtf/.doc/.docx/.txt
comhaid íomhá	.jpg/.gif/.tiff/.png
comhaid fuaime	.wav/.mp3/.m4a
comhaid físe	.avi/.mov/.mp4
scarbhileoga	.xls/.xlsx
Comhaid PDF Adobe Acrobat	.pdf

Ar mhaithe le háisiúlacht, bailigh le chéile na comhaid go léir a theastóidh uait in áit inrochtana ar do ríomhaire.

Naisc URL a chur isteach

Tabhair faoi deara: is féidir úsáid a bhaint as naisc chuig ardáin sruthaithe le samplaí de shaothar a thabhairt. Ní mór ábhar tacaíochta neamhspleách amhail CVanna agus litreacha tacaíochta etc. a uaslódáil mar cháipéisí ar leith le d'iarratas.

In áit d'ábhar a uaslódáil go díreach, féadfaidh tú naisc a chur ar fáil chuig ábhar atá á óstáil ar ardáin sruthaithe nach gcuireann teorainn ar rochtain trí shíntiús airgeadais. Chun é sin a dhéanamh, cóipeáil an URL (seoladh iomlán an tsuímh ar a bhfuil d'ábhar á óstáil) isteach i gcáipéis Microsoft Word (Deisce) nó OpenOffice Writer nó cáipéis PDF agus uaslódáil é mar cháipéis tacaíochta ina bhfuil nasc gréasáin.

“Cé nach liosta iomlán é seo, ba shamplaí d'ardáin chomhroinnte inghlactha iad YouTube, Vimeo, SoundCloud, Bandcamp.

Tabhair faoi deara nach nglacfaimid le naisc chuig na foinsí seo a leanas:

- Suíomhanna comhroinnte comhad – e.g. Google Drive, OneDrive
- Ardáin na meán sóisialta – e.g. Meta, Instagram
- Do shuíomh gréasáin pearsanta féin

Tabhair faoi deara: ní bhreathnóidh na measúnóirí ach amháin ar naisc URL a chuireann tú ar fáil. Tá sé tábhachtach go ndéanfaidh tú cinnte go n-oibríonn gach nasc sa doiciméad agus go dtugann na naisc an breathnóir chuig an bhfoinse cheart ionas go mbeidh an breathnóir in ann rochtain a fháil ar d'ábhar tacaíochta agus breathnú air.

Ná marcáil d'ábhar mar 'príobháideach' mar nach mbeidh sé ar fáil lena mheasúnú. Athraigh na socruithe ar d'fhíseán go 'neamhliostaithe' más rud é nár mhaith leat go mbeadh an pobal in ann féachaint ar ábhar tacaíochta an iarratais ar do chainéal YouTube.

Comhaid a ainmniú go cuí

Maidir le gach comhad a bhfuil sé ar intinn agat é a uaslódáil, tabhair comhadainm air a léiríonn go soiléir cad atá ann nó cad a léirítear leis – i.e. mar shampla ba cheart go mbeadh sé soiléir ó ainm an chomhaid cibé an CV, téacs samplach nó léirmheas ar shaothar roimhe seo atá sa cháipéis.

Cuir cáipéisí tacaíochta isteach i gcomhaid ar leith atá ainmnithe go cuí.

Ainmneacha	russelljack iarratas ar Thionscadal Ailtireachta.doc
maithe le	russelljack gearrthóg taibhithe.mp4
tabhairt ar	russelljack Tionscadal ailtireachta teimpléad buiséid babhta 2.xls
chomhaid i gcás	russelljack nasc youtube.doc
iarratasóra darb ainm Jack Russell	

Is é **40 MB** an t-uasmhéid iomlán maidir leis an ábhar tacaíochta ar fad a uaslódáiltear le hiarratas amháin.

Tabhair faoi deara: níl cead na carachtair seo a leanas a úsáid i gcomhadainmneacha " * : < > ? / \

2.4 Iarratas a dhéanamh ar líne

Chun d'iarratas a chur isteach ar líne, ní mór duit dul trí cheithre phríomhchéim. Cliceáil ar **Sábháil dréacht** ag deireadh gach céime. Is féidir leat teacht ar ais chuig d'iarratas agus é a athbhreithniú tráth ar bith sula gcuirfidh tú isteach ar deireadh é.

2.4.1 Roghnaigh clár maoinithe agus íoslódáil foirm iarratais

Chun tús a chur le hiarratas nua, cliceáil ar an gcnaipe **Déan iarratas** ar do leathanach baile, agus lean na leideanna chun an clár cuí maoinithe a roghnú agus chun uimhir uathúil thagartha a thabhairt do d'iarratas, trína n-aithneofar é. Ag an gcéim seo, is féidir leat an fhoirm iarratais a íoslódáil freisin (mura bhfuil sé sin déanta agat cheana féin).

2.4.2 Iarr méid an mhaoinithe

Ag an gcéim seo, sonraigh an caiteachas agus an t-ioncam a bhaineann le do thogra, agus méid an mhaoinithe atá á iarraidh agat. Ba cheart gurb ionann **an Méid atá á iarraidh** agus **Caiteachas iomlán** lúide **Ioncam iomlán**. Ba cheart go mbeadh na figiúirí deiridh a iontrálann tú anseo díreach cosúil leo siúd a iontrálann tú i gcuid 3 den fhoirm iarratais agus i do bhuiséad mionsonraithe.

2.4.3 Uaslódáil an fhoirm iarratais agus an t-ábhar tacaíochta

Lean na leideanna chun d'fhoirm iarratais atá comhlánaithe agat a uaslódáil, mar aon le buiséad mionsonraithe, CVanna agus aon ábhar tacaíochta riachtanach eile (féach ar chuid **1.7 Cén t-ábhar tacaíochta nach mór duit a chur isteach le d'iarratas?**). Ní gá duit gach rud a

uaslódáil ag an am céanna. Is féidir leat d'iarratas a shábháil mar dhréacht, agus teacht ar ais chuige níos déanaí.

Tabhair faoi deara:: má tá d'fhoirm iarratais curtha i gcrích agat mar chomhad **.docx**, agus má tú muiníneach go bhfuil d'fhoirm iarratais líonta isteach i gceart (lena n-áirítear clóscríobh laistigh de na réimsí liatha) ach go léiríonn na seirbhísí ar líne teachtaireacht a deir nach féidir an fhoirm a uaslódáil, déan iarracht í a shábháil mar chomhaid **.doc** agus í a uaslódáil arís.

2.4.4 Seol an t-iarratas

Nuair a bheidh tú sásta go bhfuil gach rud atá de dhíth chun tacú le d'iarratas uaslódáilte agat agus tic curtha leis an dearbhú agat, cliceáil **Cuir isteach**.

Ní féidir an t-iarratas a athrú tar éis é a chur isteach. Ná cuir an t-iarratas isteach go dtí go mbeidh tú iomlán sásta leis.

Ba cheart go bhfaighfeá dhá ríomhphost. Eiseofar an chéad cheann láithreach bonn nuair a gheobhaidh an Chomhairle Ealaíon d'iarratas. D'fhéadfá an dara ceann a fháil cúpla nóiméad ina dhiaidh sin agus d'uimhir iarratais ann, a úsáidfear i ngach comhfhreagras a bhaineann leis an iarratas seo. **Tabhair faoi deara:** tá sé tábhachtach go rachfá i dteagmháil le onlineservices@artscouncil.ie mura bhfaigheann tú an dara ríomhphost deimhnithe ina mbeidh an uimhir iarratais.

3. Próiseáil agus measúnú na n-iarratas

3.1 Forbhreathnú

Déanann an Chomhairle Ealaíon gach iarratas a mheas, tugann sí breith orthu agus cuireann sí a breith in iúl do na hiarratasóirí de réir na nósanna imeachta atá leagtha síos. Is é an aidhm atá ann a chinntiú go bhfuil córas cothrom trédhearcach ann maidir le dámhachtainí a bhronnadh.

3.2 An próiseas measúnaithe

Déanann an Chomhairle Ealaíon gach iarratas a fhaightear a phróiseáil mar seo a leanas:

- 1 I ndiaidh d'iarratas a chur isteach, ba cheart go bhfaighfeá dhá ríomhphost:
 - Eiseofar an chéad cheann láithreach bonn, agus admhófar d'iarratas leis.
 - Ba cheart go dtiocfadh an dara ceann cúpla nóiméad ina dhiaidh sin. Beidh d'uimhir iarratais ann, a mbainfimid úsáid aisti sa chomhfhreagras ar fad faoi d'iarratas.

Tabhair faoi deara: ní chiallaíonn na ríomhphoist seo ach go n-aithníonn an córas ar líne gur chuir tú iarratas isteach. Ní chiallaíonn siad go bhfuil d'iarratas incháilithe le haghaidh measúnú.

Mura bhfaigheann tú ríomhphost ina mbeidh d'uimhir iarratais, téigh i dteagmháil le onlineservices@artscouncil.ie

- 2 Seiceáiltear inghlacthacht an iarratais. Féach ar chuid **1.8 Incháilitheacht** thuas.
- 3 Déanann comhairleoir(i) agus/nó an fhoireann measúnú scríofa ar an iarratas.
- 4 Molann comhairleoir(i) agus/nó an fhoireann ar cheart iarratas a chur ar an ngearrliosta nó nár cheart.
- 5 Déanann an painéal piaraí athbhreithniú ar na hiarratais go léir ar an ngearrliosta agus ar an ábhar gaolmhar, ansin tugann sé scóir agus déantar cinntí.
- 6 Cuirtear na cinntí in iúl do na hiarratasóirí i scríbhinn.
- 7 Déanann an Chomhairle nóta de na cinntí.

Achar ama

Déanann an Chomhairle Ealaíon dianiarracht iarratais a mheasúnú chomh tapa agus is féidir ach mar gheall ar líon na n-iarratas agus ar an bpróiseas dianmheasúnaithe, tógfaidh sé suas le dhá sheachtain déag ón spriocdháta go dtí go ndéanfar an cinneadh.

3.3 Critéir chun iarratais a mheasúnú

Déantar iarratais a mheasúnú i gcomhthéacs iomaíoch agus cuirtear an fhoirm iarratas agus na hábhair thacaíochta san áireamh. Déantar measúnú ar gach iarratas i gcoinne na gcritéir seo a leanas: **a)** fiúntas ealaíne, **b)** an chaoi a gcomhlíonann siad cuspóirí agus tosaíochtaí na dámhachtana, agus **c)** indéantacht. Cuirtear síos ar gach ceann de na critéir sin thíos.

Cé go bhféadfadh iarratasóirí foirmeacha ealaíne/cleachtas ealaíon eile a roghnú atá ábhartha dá n-iarratas, déanfaidh an fhoireann atá freagrach as an bpríomhfhoirm ealaíne

roghnaithe an measúnú agus d'fhéadfaidís siúd, i gcásanna áirithe, measúnú tánaisteach a iarraidh ar fhoireann eile.

Fiúntas ealaíne

Dírítear le measúnú ar an bhfiúntas ealaíne ar an iarratasóir agus orthu siúd atá bainteach leis an tionscadal chomh maith le nádúr na gníomhaíochta ealaíon atá beartaithe, agus tharlódh go n-áireofaí leis, i measc eile, breathnú ar an méid seo a leanas:

- Caighdeán an smaoinimh agus na gníomhaíochta ealaíon atá beartaithe
- Cuntas teiste an iarratasóra agus an phearsanra ealaíonta a bhfuil baint acu leis an tionscadal faoi mar a thaispeántar é ina CVanna agus sna hábhair thacaíochta eile a cuireadh isteach
- Acmhainn an iarratasóra agus an phearsanra ealaíonta de réir mar atá léirithe san fhoirm iarratais agus san ábhar tacaíochta a cuireadh isteach
- An uailmhian, an úrnuacht agus an inniúlacht atá léirithe sa togra
- Conas a léirítear nuálaíocht, triail agus comhoibriú san iarratas.

Cuspóirí agus tosaíochtaí na dámhachtana a bhaint amach

Déantar iarratais a mheasúnú de réir a fheabhas a éiríonn leo cuspóirí agus tosaíochtaí na dámhachtana a chomhlíonadh – féach ar chuid **1.1 Cuspóirí agus tosaíochtaí na dámhachtana** le tuilleadh sonraí a fháil.

Indéantacht

Breathnaítear sa mheasúnú indéantachta ar an gcumas a léiríonn an t-iarratasóir an ghníomhaíocht atá beartaithe a chomhlíonadh. Áirítear air sin breathnú ar na nithe seo a leanas:

- Cuntas teiste an phearsanra a bhfuil baint acu leis an tionscadal a bhainistiú, a riar, agus a sholáthar
- A mhéid a léiríonn an t-iarratasóir go bhfuil coinníollacha agus luach saothair cothrom á soláthar do na healaíontóirí rannpháirteacha
- Méid rannpháirtíochta agus/nó tiomantais dheimhnithe na gcomhpháirtithe tionscadail aitheanta
- An buiséad atá beartaithe
- Foinsí eile ioncaim
- Acmhainní eile atá ar fáil agus an teacht atá orthu
- An clár ama nó sceideal beartaithe agus/nó pleananna léirithe.

3.4 Painéal piaraí

Is é cuspóir chruinnithe an phainéil piaraí ná éagsúlacht tuairimí saineolacha a cheadú chun faisnéis a chur ar fáil don phróiseas cinnteoireachta. De ghnáth cuimsíonn painéil phiaraí triúr moltóirí seachtracha ar a laghad a bhfuil saineolas ábhartha acu ar an bhfoirm ealaíne agus/nó ar an gcleachtas ealaíon.

Bíonn comhalta de chuid na Comhairle Ealaíon i gceannas ar gach cruinniú de ghnáth agus gníomhaíonn an comhalta sin mar chathaoirleach gan ceart vótála. Freastalaíonn comhairleoirí agus foireann na Comhairle Ealaíon ar na cruinnithe de réir mar is gá, agus

bíonn na daoine a raibh baint acu le measúnú tosaigh na n-iarratas ar fáil chun faisnéis a sholáthar, de réir mar is gá. Beidh rochtain ag lucht an phainéil ar gach iarratas ar an ngearrliosta agus ar an ábhar gaolmhar go léir lá roimh an gcuinniú, tráth a ndéanann siad na hiarratais ar an ngearrliosta a athbhreithniú, a phlé agus a scóráil. Ina dhiaidh sin, déantar iarratais a rangú de réir scóir. Mar thoradh ar an gcomhthéacs iomaíoch agus ar an mbuiséad ar fáil, is dóigh nach mbeidh an Chomhairle Ealaíon in ann a mhaoiniú ach líon beag de na hiarratais a gheofar.

Próiseas Scórála

Iarrtar ar an bpainéal na hiarratais a scóráil de réir an chórais seo a leanas:

- A – Caithfear a Mhaoiniú (10 bpointe): dar leis an gcomhalta painéil gur comhlíonadh na critéir go léir san iarratas le haghaidh na dámhachtana agus go bhfuil maoiniú tuillte aige ar an mbonn sin, an méid atá á iarraidh más féidir.
- B – Ba Chóir a Mhaoiniú (8 bpointe): dar leis an gcomhalta painéil gur comhlíonadh na critéir san iarratas an oiread sin go bhfuil maoiniú tuillte aige má tá acmhainní ar fáil.
- C – D’fhéadfaí a Mhaoiniú (5 phointe): dar leis an gcomhalta painéil gur comhlíonadh na critéir san iarratas, ach ní an oiread sin leis na hiarratais eile ó thaobh iomaíochta de.
- D – Ní Tosaíocht É (2 phointe): dar leis an gcomhalta painéil nár comhlíonadh na critéir san iarratas an oiread sin go bhfuil maoiniú tuillte aige.

Dearbhú leasa

D’fhonn cothroime agus cothromas sa chinnteoireacht a chinntiú, ní mór do chomhaltaí painéil leas a dhearbhú má tá dlúthcheangal pearsanta nó gairmiúil acu le hiarratasóir nó má tá baint acu ar shlí ar bith leis an iarratas. Féadann ‘leas’ a bheith ina ‘leas airgid’ nó ina ‘leas neamhairgid’ (e.g. gaol muintire, comhpháirtíochtaí pearsanta, nó comhpháirtíochtaí gnó idir fhoirmiúil agus neamhfhoirmiúil, etc.)

Ní mór an leas a dhearbhú a luaithe agus is eol don chomhalta painéil é a bheith ann. D’fhéadfadh sé sin tarlú ag an bpointe nuair a iarrtar air/uirthe suí ar an bpainéal (más eol an ‘leas’ ag an bpointe sin) nó tar éis liosta na n-iarratasóirí a fháil. I gcás go ndearbhaítear leas, ní bhfaighidh an comhalta painéil sin páipéir a bhaineann leis an iarratas sin agus beidh air nó uirthi an seomra a fhágáil nuair a bhíonn an t-iarratas ar leith á athbhreithniú. Nuair a thagann an cás sin aníos, vótálfaidh an Cathaoirleach in ionad an chomhalta painéil.

I roinnt cásanna, d’fhéadfadh sé nach n-aithneodh comhalta painéil go bhfuil coinbhleacht leasa ann go dtí go bhfaigheann agus go ndéanann sé/sí athbhreithniú ar na páipéir phainéil. I gcásanna den sórt sin ní mór don chomhalta painéil ball foirne den Chomhairle Ealaíon nó Cathaoirleach an phainéil a chur ar an eolas chomh luath agus a thuigeann siad go bhféadfadh coinbhleacht leasa a bheith i gceist.

Sa chás go gcuireann beirt ón bpainéal in iúl go bhfuil coinbhleacht leasa acu i leith aon iarratais amháin, beidh an cathaoirleach páirteach mar chuid den phróiseas cinnteoireachta i gcás an iarratais shonraigh sin.

Má tá coinbhleacht leasa ag Cathaoirleach ainmnithe an phainéil, ní mór dóibh é sin a dhearbhú a luaithe agus is eol dóibh go bhfuil a leithéid ann agus an fógra sin a thabhairt i scríbhinn roimh an gcuinniú. Sa chás sin, beidh an Ceann Foirne mar chathaoirleach ar an bplé a dhéanfar maidir leis an iarratas a bhfuil coinbhleacht leasa i gceist leis.

3.5 Toradh na n-iarratas

Cuirtear gach iarratasóir ar an eolas i scríbhinn maidir le toradh a n-iarratas.

Cuirfear ríomhphost chugat mura gcuirtear d'iarratas ar ghearrliosta. Má chuirtear d'iarratas ar ghearrliosta, déanfaidh an coiste athbhreithniú air.

Má éiríonn le d'iarratas, cuirfear litir thairisceana chugat ina sonrúfar méid an mhaoinithe a bhronnfar ort agus téarmaí agus coinníollacha na dámhachtana. Inseofar duit freisin conas do dhámhachtain a tharraingt anuas.

Faigheann an Chomhairle Ealaíon líon mór iarratas, agus bíonn an t-éileamh ar mhaoiniú i gcónaí níos mó ná na hacmhainní a bhíonn ar fáil. Mura n-éireoidh le d'iarratas, is féidir leat aiseolas a iarraidh ar fhoireann na Comhairle Ealaíon. Níl aon ghealltanas ann go mbronnfar dámhachtain mar gheall ar incháilitheacht agus ar chomhlíonadh nósanna imeachta iarratais amháin.

Níl iarratasóirí nach n-éireoidh leo incháilithe chun iarratas a dhéanamh ar dhámhachtain eile de chuid na Comhairle Ealaíon le tabhairt faoin ngníomhaíocht chéanna. Más dóigh leis an gComhairle Ealaíon go mbeadh an ghníomhaíocht atá beartaithe níos feiliúnaí do chlár dámhachtana eile is féidir eisceacht a dhéanamh. I gcás dá leithéid, cuirfear é sin in iúl duit i scríbhinn.

Achomhairc

Is féidir le hiarratasóirí cinneadh maoinithe a achomharc má mheasann siad gur sáraíodh nósanna imeachta foilsithe na Comhairle Ealaíon, nó gur cuireadh i bhfeidhm go héagórach iad nó nár cloíodh leo. Má mheasann tú nár cloíodh le nósanna imeachta na Comhairle Ealaíon, breathnaigh ar an bpróiseas achomharc ar <http://www.artscouncil.ie/ga/Maoiniu/Achomhairc/> nó téigh i dteagmháil leis an gComhairle Ealaíon le haghaidh cóip den bhileog faisnéise faoin bpróiseas achomharc.